

姚文敏公遗稿

附录



姚文敏公遺稿

附錄

(二)

姚張
夔元
著正
校禎



鎮

中華民國二十五年十二月初版

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

王雲五主編

叢書集成初編

姚文敏公遺稿及其他一種

二冊

(本書校對者章德宣 徐鼎銘 蔡仲宣)

姚文敏公遺稿卷之七

記

崇古堂記

堂以崇古名。崇古之道也。古之道不出於民生日用之常。若古堯、舜、禹、湯、文、武、周公、孔子。大聖也。顏、曾、思、孟。大賢也。而其所言所行。載之於書。可爲天下後世法者。不過曰五常而已。仁之於父子也。義之於君臣也。禮之於夫婦也。智之於兄弟也。信之於朋友也。聖人於是言之精。行之到。足以垂法於天下後世。而天下後世。舍是不足以爲法。去古既遠。民僞日滋。苟不以貨利是殖。則唯古金石圖書器玩。是尊是好。且曰。吾崇古崇古。而不知古之道爲何物。噫。可悲也已。有一人焉。自異於恆衆人。慨古聖賢之道。不復見於今。思有以崇之。遵古言。循古行。生我焉。崇古孝。食我焉。崇古忠。先我則崇其悌。齊我則崇其別。類我則崇其信。曰孝。曰忠。曰悌。曰別。曰信。非古道乎。吾從而崇之。今古合而爲一。且將接堯、舜、禹、湯、文、武、周、孔。於夢寐之間。而與顏、曾、思、孟。爲友矣。是可謂之善崇古者哉。蘭溪去縣西南三十里。申元潭江氏世居焉。有諱長字世英者。志古道。八世祖諱惇。仕宋爲朝散郎。知處州。嗜古甚篤。香溪范先生名其所居之堂曰崇古。且爲文記之。迄今三百餘年。堂記不復存。世英奮八世之餘。而承其休。乃卽舊基。構堂三楹間。大揭崇古二字于楣。曰。此先志也。凡經籍所載古聖賢所言所行。人倫五常之道。蓋亦究知其說。篤信而力行之。

家庭之間。父父子子。夫夫婦婦。兄兄弟弟。雍如穆如。庶幾三代之風焉。謂非克崇古道能之乎。嗟夫。道在天地間。徹上下。貫始終。不裕於古而歉於今。何今人不古若哉。特未知所以崇之耳。苟知崇是道。人雖今。遂謂之古。亦可也。矧古其道矣。亦何害其爲今人哉。世英生今之世。超超然有志於古之道。俾先世之堂。煥乎復新於三百餘年之後。此紹述之孝。亦古道也。況不徒銜其名以訐俗。而鑿鑿有實行。上以追繼祖武。下以訓示子孫。於乎。誠可尙也哉。世英沒。其子永貴。式克榦蠱。次子永敬。以明經爲國子生。且將高其門。以華斯堂也。永敬嘗從予遊。來請記。故書之。

潤遠堂記

桐廬越大江之南四里許。曰華林。有山蜿蜒而來。蹶然而止。水瀾瀾環抱而流。土雖不甚腴。而谷實甘美。亦隱者所宜居也。洪武間。邑人王翁仕玉于焉。卜築爲行樂所。堂落成。適禮部尙書浦江鄭公沂過訪。遂名其堂曰潤遠。手書揭于楣。意有在也。翁沒。其子景益甫。閔堂之舊且敝也。將撤而新之。乃命工度材。或旬致一木焉。或月致一木焉。又或累旬月致一木焉。其經營規畫。不亟而徐者。功欲漸而人不勞。得公子荆之遺意也。奈何天弗憖遺。未半而甫終。惜哉。越十餘載。甫子仲啟。顧堂慨然曰。吾大父建是以遺吾父。吾父將新之以遺我。而弗竟。我敢以孱菲墜前人之業之志。而罔圖繼述乎。於是因甫之遺材。補其不足。增其未備。且不忍廢其舊。葺而完之。卽其左方。鑿山以舒其後。塞池以夷其前。彷彿舊規。而鼎建之。不一。年而成。蓋曰予亟以底績。非異也。將以成先志耳。乃復扁以潤遠。躬走京師。謁予爲記。予歎曰。旨哉尙書。

公之名堂也。其殆驗于茲乎。夫雨露之沾濡。萬物滋也。江河之流衍。千里達也。若夫人之潤且遠者。莫如德與善也。原自一身以及子孫。一意流通。而慶被無窮焉。奚啻乎雨露之沾濡。江河之流衍也哉。昔萬石君謹行篤善。而子孫累世榮盛。范文正謂積德百餘年。始發於吾。然則心之所存。潤及於遠。詎不信哉。予觀翁倜儻好施與。甫仗義不忤求。仲啟小心謹畏。而其子又淳雅循禮。四世相承。前作後述。秩秩繩繩。愈潤愈滋。愈遠愈達。孰非原於翁之一身之所及哉。尙書公預占而早信之。其有所試矣。是堂也。朴素渾堅。高明爽闔。容與深宏。宜居宜適。仲啟將享祖宗于斯。會族屬于斯。訓子孫于斯。千百其年。是承是繼。則其所謂潤遠也。豈有涯哉。於乎。王氏子孫。登是堂也。尙思其勿替。

雲間第一橋記

天順七年秋七月。雲間第一橋成。兵部郎中葉君萱。工部主事宋君瑛。述其鄉父老之意。來言曰。松城之西有巨津焉。控扼驛道。舊有捲虹橋。成於元至正間。久之就圯。石爲衛丁輦以築城。橋遂泯。民卽舊址西三十步。架木以渡。累修輒壞。行者病涉。因而失所者。歲不知其幾。有司莫之或省。嚴陵洪侯景德。通守是邦。慨然歎曰。是獨非有司事耶。方將圖之。顧歲歉未可爲也。屬天順庚辰。歲告稔。明年再稔。又明年大稔。度可爲矣。適造民版。侯總焉。嚴約里書。而懲其違。願贖以石者聽。未幾石林立。尋督兌瓜埠漕。往年民苦蹂於軍。侯設法交兌。平民悅。願以所餘糧給工。費百須咸具。復捐奉入以佐餼廩。遂白欽差巡撫右副都御史萬安劉公。而郡守潮陽李侯惠復贊成之。乃屬耆民莫達。吳鳳等董厥事。庀工於是年春正月。暨成。

爲日二百二十有一橋長二十有六丈廣一丈六尺。灑水爲五道。用石以丈計者五千。麻鐵石灰以斤計者十萬四千有奇。松柏木爲根者千。其功堅實。其勢雄壯。下可通舟楫。上可驟車馬。詔命符節由於斯。賓客行旅由於斯。樵耕漁牧男女擔負由於斯。昔也病。今也樂。昔也危。今也安。嘯歌嬉嬉。咸曰非侯之力不及此。諸父老乃因衆志之同。敢請一言。記其成績。予曰。周官道路橋梁以時修除。固有司常事。夫何言。二君曰。諸父老之意。非以橋爲也。如以橋。則侯嘗於城東建洞經橋。又嘗建俞塘橋。不敢有請也。唯是侯之惠澤加於松民者良多。不可覩縷。姑舉大者言。吳淞江曹家河及新經計數百里。湮塞爲平陸者百餘年。侯度地相時。疏鑿浚淪。不月而河復故道。潮汐以通。潢潦以泄。農商攸賴。松民德之。未有紀極。姑將託橋以永侯之惠政。矧是橋之成。負九峰面三泖。太湖居其西。大海環其東。憑城據壑。勢若巨鼇。誠足以壯觀一方。利濟無窮焉。不有以記之。何以示不朽。願勿靳。按春秋興作書。至於浚洙築臺城邑作門之類。必書者。非時害義譏之也。時且義亦書者。謹土功重民力也。今侯修建河梁。於民事有不可已者。然必度歲豐以舉事。因公務以聚材。民樂於趨赴而不知勞。工喜於效勤而不告病。又且制用有方。度程得宜。可謂不勞民傷財。合時與義。得春秋之法矣。是故法不必書。而必書者。從衆志。詔後來也。後之君子。尙察侯之心。毋忘其成績而嗣修焉。俾勿湮且壞。是則松民之望。亦作記者之意也。

梅坡記

桐江之西。釣臺之東。有子泉。其地負高山。面長江。中曠三五里。皆平疇。可以耕。可以樵。可以漁。隱者於是

焉居超然塵世之外。而不知日月之居諸也。宋宗室之裔曰趙永和甫。暨厥弟永甯甫。世居其間。含仁茹義。韜機晦華。其殆所謂隱君子乎。伯甫之子曰叔英。天性淳淑。雅敦禮文。方弱冠。奮然有匡世志。顧二翁素行高尙。業弗容異。恭修孝弟忠信之行。于家庭鄉黨間。厚而散之。周於仁。薄而聚之。敦於義。其視榮名利祿澹如也。真克肖前人高尙厥志者歟。且以天下之物。合吾志而得高尙之節者。唯梅庶幾乎。乃於宅南之坡。構軒爲行樂所。植梅數株。曰是吾志也。因自號爲梅坡。俾予爲之記。夫人各有志。所尙不同。志潔者愛乎蓮。志逸者愛乎菊。志清者愛乎竹。志剛者愛乎松。豈真有所相契哉。無非各因其所尙。託以寓夫志焉耳。今夫梅。玉骨冰肌。得蓮之潔。暗香雅韻。得菊之逸。疎枝奇幹。得竹之清。凌霜傲雪。得松之勁。兼四種之高致。引一歲之陽華。其品肇於炎帝之經。其味著於說命之書。其風致詠於召南之詩。梅之資於用也大矣。豈惟菊蓮竹松云乎哉。叔英君之志。蓋其茲乎否也。當夫春日載和。緋桃與縞李爭妍。丹杏與璚梨競麗。梅且不動聲色。恬然自處。易曰。衆方有爲而獨高尙其事者。梅其似乎。及夫窮冬沍寒。呈秀於江皋野壑之間。含芳於短牆疎籬之下。無妖冶之態。有幽閒之芬。易曰。處困而不失其亨者。梅非其似乎。嗟夫。易之義大矣哉。梅一植物耳。而有合於大易之道如此。宜叔英君所以嗜之深也。蓋將因梅以究乎易。因易以勵乎行。因行以求乎時。因時以思乎義。則志於是乎善矣。夫梅豈可以一植物之隱者目之乎。叔英君其庶幾見取於梅。而寓其志者在此也已。不然。人何以呼之曰梅坡居士。遂爲之記。

臥雪庵記

浙多佳山水。吾桐廬尤幽詭特絕。宜隱者所居也。邑之九田灣。昔戴顓嘗隱居於此。杉櫨竹箭。蔽虧左右。澗泉雲物。交映下上。四時朝暮。變幻晦明。無弗可愛。有希古君子。袁永敬甫。以漢邵公後。慨慕祖風。結庵其間。以臥雪自號。於繁華景物。若相遺者然。豈其地獨於冬爲宜歟。庵之大。廣袤不踰尋丈。有圖有書。散帙滿案。隨所諷詠。起居何常。當夫玄冥司辰。滕六布花。千徑滅蹤。萬類呈縞。甫於斯時。擁被偃休。徹竇傲睨。近俯桐君之丹竈。遠眺子陵之釣臺。庶幾若有負鋤斲苓。荷竿把釣。被鶴氅。蒙羊裘而來者。閔然長嘯。嚮答崖谷。不知天地之爲寬。茲庵之爲隘也。庸詎知夫通都大衢之中。有足沾重泥。輪激飛澤者哉。乃若錦帳羊羔。淺斟低唱。曾不足以引頤接眦。而或者方欲以爲富貴驕人。何足道哉。嗟夫。離世高蹈者。固不以富貴爲心。超塵邁跡者。斯不以繁華是慕。觀甫以臥雪自居。可以知其爲人矣。昔邵公以一節高當世。後登台輔。大著勳業。垂於史傳。至今人爲美談。甫承邵公之後。而不替邵公之志。使見用于世。其所爲焉可量哉。惜乎甫年逾七旬。志與時違。矧無見知如洛陽令者。亦樂其道。終于隱而已矣。雖然。甫能以道自樂。必能養天地之和。得天地之和。則存於心也悅。見於身也順。中煦外適。長久優裕。其將臻于壽考。如雪中之松柏。歷歲寒而不變者矣。此又邵公所不能有也。姑書此于庵之壁。甫乃吾弟福建左布政使納言婦翁也。

留耕記

或問留耕處。士曰。子之所謂留耕者。爲孰留。處士曰。爲吾子孫留爾。或曰。卓彼甫田。歲取十千。所留者是

耶。曰否否。曰無田甫田。維莠騶騶。是子孫未必能取也。俶載南畝。播厥百谷。所留者是耶。曰否否。曰厥父菑厥子。乃弗肯播。是子孫未必能穫也。然則何居。曰吾以方寸爲良田。以腔子爲區畝。以仁義禮智爲谷種。以惻隱羞惡辭讓是非爲靈苗。以父子之親君臣之義夫婦長幼朋友之別之序之信爲稼穡。以誠敬爲耒耜。以省察克治爲耘耨。彼殘忍者仁之稂莠也。貪懦者義之稂莠也。誕謾奸深禮智之稂莠也。吾芟之刈之。去之盡而後已。於是充之以旦氣。養之以和樂。俾之有所灌溉焉。迨夫體履既實。力行已熟。則我稼旣同矣。斂之于身。則飽乎仁義矣。推之于人。則周乎鄉黨矣。此吾田之有秋也。且吾是田。不必沾體塗足之勞。不必刀耕火耨之苦。上無公賦之斂。下無私科之擾。趙孟之貴不能加。晉楚之強不能奪。良平之智不能謀。多耕則多穫。少耕則不穫。是之謂心田也。吾是田存之唯謹。非徒自爲留與吾子孫耕耳。自他人言之。方寸之地。無阡陌之廣也。無金玉之富也。遺之子孫。不亦微乎。自吾視之。方寸之間。百穀生焉。萬寶聚焉。吾以是留之子孫。於是而耕之。則實繁實茂。綿綿不已者在是矣。彼阡陌之廣。金玉之富。孰與是多哉。然則吾之所留雖微。而子孫所獲實大矣。或人唯唯。退而告諸損菴。損菴曰。旨哉言乎。昔人有詩曰。但存方寸地。留與子孫耕。處士之意。殆有得於是歟。處士曰。得之矣。遂命識之。處士予第四兄也。字克恭。孝友忠信。孚于家而著于鄉。方寸坦夷。好善樂施。年踰六旬。夫婦偕老。蘭桂滿前。積有餘慶。將來子子孫孫。享厥耕之利。豈有涯哉。謹記。

耕雲記

耕雲子居書林。性朴而行確。爵祿不入於心。有犁手一牛。日往耕於南隴之上。時有白雲。自萬山中出。朝朝暮暮。悠悠揚揚。浮游往還。若有意於相依者。耕雲子耕於雲中。不自知其爲雲也。人見之。輒呼曰。耕雲子。客有儒衣冠者。過而問曰。子何事乎。耕沾體塗足。終歲勤動。水耕火耨。食不給口。不亦所務勞而所獲儉乎。耕雲子曰。唏吁。是非爾所知也。夫士農工商。各專其一人所事。亦量力。是故士之所業。在乎文藝。磨研六經。疏滌百氏。貫通天人。綜括物理。操觚執翰。摘章藻句。棹鞅文場。策名科第。高牙大纛。腰金紆紫。澤被當時。道濟斯世。如裴晉國之功。成身退。韓魏公之錦衣故里。吾非惡此而不爲。顧吾才命之未際。工之所業。在乎利器。目爲準繩。手爲規矩。運斤成風。揮策合制。刻雕藻繪。窮極曲藝。程功計能。餽廩稱事。如公輸子之神於巧思。輪扁氏之工於斲輪。吾非惡此而不爲。顧吾機智之莫企。乃若行則爲商。坐則爲賈。經營是圖。懋遷是務。珠璣寶玉。金穀錢布。貴賤相乘。錙銖異數。日積月盈。藏蓄鉅富。如呂不韋之識奇貨。陶朱公之豐府庫。吾非惡此而不爲。顧吾變通之莫晤。客曰。然則子之所事。其農乎。耕雲子曰。然。夫神農肇種。后稷躬耕。蒸民乃粒。萬世歸仁。越彼南畝。疆域攸分。溝塹鏤刻。相次如鱗。一日二日。農事聿興。載耕載耨。以耔以耘。勤我東作。望彼西成。笠簞滿車。如坻如京。上以足賦。下以周貧。飽食煖衣。家室孔殷。此諸葛所以耕於南陽。伊尹以之耕於有莘。吾非樂此而爲之也。實吾力之能勝。客唯唯。不能詰。耕雲子乃輟其耕。憩於桑陰。叩牛角而歌曰。白雲兮悠悠。往來兮山之陬。荷吾耒兮牽吾牛。遵南畝兮仍西疇。載耕兮載耨。日暮兮歸休。望秋成兮有收。倉廩實兮無憂。酌村醪兮旣醉。鼓吾腹兮歌謳。堯舜在上兮輔伊周。吾生

兮容何求。歌竟，不覺白雲漸收。紅日西沉，枕簟而臥。鼻息雷鳴，客莫喻其意。退而走金臺，告予於南宮。予耕雲子內弟也，故述客言，俾歸以勸諸農。耕雲子姓吳，字仲文，客則上舍鄭君景常也。

大樹記

大樹者，桐廬姚家山之樹也。山以姚名，姚氏世業也。故姚氏之墓在焉。去縣之南，濱大江，不一里所。山之祖龍發於南山，蜿蜒十餘里而來，或起或伏，奔走不及望見大江，頓止回首卻顧，昂然南向，其勢如天馬奮躍，馳驟康莊。王良御轡，五丁挽首，急不得駐，如蒼龍出壑，屈伸俯仰，變化萬狀，頭角倏然，轉顧左右前後，原田彌望數百頃，有溪自遠山來，迂迴宛轉，迎山折瀉于右脇之下，滔滔環麓而去，固多佳木，而大樹根據山首，其木體軒昂，合三人之抱，弗能周。皮如鱗次，色如青銅，高可百尺，千枝萬柯，虬飛蛇走，屈鐵聳牙，周旋布置，四圍環匝，中高傍下，碧葉紛敷，蔭蔽稠密，鬱然長青，實可療飢，盡山首十餘畝，並在覆幬中。根傍有藤如巨蟒，依附而上，纏繞柯枝間，殆不啻數千尺。春三月，花開如絳桃色，採之亦可食，名紫金藤。一名朱藤花，樹下諸墓，纍纍聳列，最高處姚氏始祖榮祿學賓之墓也。稍下右，予曾祖鼎二府君之墓也。又稍下左，予祖贈禮部侍郎伯華府君之墓也。墓皆夫婦合葬禮也。每歲清明，合姚氏宗族子孫，不問老少，皆往祭焉。祭畢，以其餘設宴大樹下，男女以班坐，不喧不褻，情洽禮周而散於乎。爾大樹之有功吾家也，大矣。吾祖宗居於此，吾子孫不能日侍左右，爾大樹恆儼若衣冠，拱立庭際，日相親近，未嘗頃刻離去。俾吾祖宗無孤立獨處之思，有憑藉倚屬之勢，每當清風徐來，萬籟俱鳴，如奏絲竹之音，協律呂之和，足

以悅吾祖宗之耳聽也。春陽載和，嫩綠交加，如翡翠凝輝，琅玕逞色，足以悅吾祖宗之目視也。爍石流金，天地爲爐，惟爾則能敷陰散涼，如華蓋擎天，翠幕席地，足以清吾祖宗之肌膚也。風露淒淒，雨雪霏霏，唯爾則能擁前護後，如大廈飛輦，氈幃四合，足以煖吾祖宗之肢體也。凡吾子孫之不能奉侍吾祖宗者，爾大樹奉侍之，周且至焉。其有功吾家也，豈細細哉？雖然，吾觀爾質，瓌琦博大，雄傑無倫，稟天地磅礴之氣，鍾陰陽挺秀之靈，據山川形勢之勝，宜爲雲霞之所覆護，雨露之所霑濡，揚芳振華，呈祥致瑞，俾吾家死者安，生者壽，子子孫孫，富貴賢哲，日有隆而無替也。噫，盛哉，是爲記。

姚氏二親墓記

姚氏二親葬于砦基山之陰久矣。砦基者，有山之總稱，昔人避亂作砦其上，後砦毀基存，故人呼爲砦基。豈南山故無名，特假此以名之耶？山勢高聳，矗起雲霄上，東抵于越，西抵于婺，橫亘數百里，自桐江視之，如翠屏碧障，列于縣前，山上多雲氣，變化無常，時出作霖雨，有龍湫，寬可半畝，水混混出，由溪澗直至大江，灌溉田數千頃，山出材木，人皆資焉，當羣峯萬仞之高，忽一脈墜下，復銳起數百仞，分三股下，從中至平地，徐徐蜿蜒而來，起伏頓挫，約六七里，稍伏輒昂，仍隱隱作兩帶垂下而止。二親之墓實當其中焉。一股從東出，狀如中股，少緩北行，過中數一里許，頭折西顧，勢微伏，有泉口廟在焉。一股從西出，狀類東股，微縮不及五十步許，折東向，勢陡然昂起，龍內昂處外伏，環抱左右，其間相去不百步，有官倉一區，數畝，儲蓄糧百萬斛，時發以濟貧民，所謂龍湫之水，迂迴宛轉，循山麓行，自東折西，作九曲灣，繞龍首而去，二

親者。故贈通議大夫禮部右侍郎諱唯善府君。配申屠氏。贈淑人。府君歿十有二年。自文化院山遷于此。又三十有四年。共四十六年矣。淑人歿于京師。其子吏科給事中夔之官舍。奉柩合葬于此。十有五年矣。塋訖。夔手植松檜楮杉等木千株。環墳無隙地。墓道左右。悉成行列對待。而下立碑石于中。去墳三十步。碑墳前。吏部尙書泰和王先生行儉撰。於法得立享堂。石人獸俱未暇也。夔自釋服。陞右侍郎。任南京刑禮二部者三。任禮部者再。奉勅雲南考察諸司者一。今陞吏部左侍郎。驅馳南北。奔走仕途。前後殆二十年。無幾微功。今髭鬢亦蒼矣。緬想二親之墓。久曠祭掃。夢寐之間。時時見之。徒切悵快。憶昔手植羣木。高不過三尺。小僅尺半許。今聞鬱鬱成林。大者斗圓。小者拱把。煙霞覆幬。雨露濛翳。參差高下。黛色交流。樹蔭幽深。土脉膏潤。凝祥散彩。自爲朝暮。精靈永安於泉扃。神爽潛孚於胤嗣。福澤之來。其有窮已。猗歟盛哉。繼今以後。爲吾子孫者。宜時加展省。一草一木。亦當保護。勿使牛羊斧斤得入焉。庶幾可謂賢子孫也已。尙勗之哉。孝男夔泣血謹記。

誠意伯祠堂記

上復大寶之明年。故開國翊運守正文臣、資善大夫御史丞、兼弘文館學士、太子贊善大夫、護軍誠意伯劉先生七世孫翰林五經博士祿。自括蒼來朝。且言曰。先臣基沒垂八十年于茲。故有祠堂燬。弗克稱者久之。神無棲止。祀罔攸享。臣祿荷國厚恩。叨守宗祧。敢以爲請。詔可其奏。下禮部移所在有司營建祠堂如制。於是浙江布政司右參議史頤、處州府知府萬安、青田縣縣丞郭仲禮咸奉行唯謹。僉議舊祠幽僻。

用陟高亢。於神爲宜。乃度地於宅之東南。惟吉。方將有以規所需。邑父老聞之。奔走相告曰。先生嘗有大造於吾民。欣然相與計田聚財。輸于官。得若干萬緡。乃涓吉辰。徵工簡材。首隆寢堂。翼以兩廡。屏以二門。齋戒有室。泡湍有舍。而又飾以黝堊。繚以周垣。制度弘深。規模軒敞。神主攸奠。煥然光輝。猗歟休哉。告成於天。順三年十二月之朔。祿詣謝恩畢。退而屬夔爲之記。竊惟先生之謨謀功業。載在國史。著之翊運錄。昭若日星。人皆知之。無所庸喙。獨出處之節。或者以嘗仕元爲疑。則不可不爲先生白其心也。先生負豪傑之才。當元之季。以春秋之學登進士第。累仕累發其奇。輒不合而去。則先生非無意於用世。不能用。遂歸隱括蒼山中。以耕食爲樂。蓋元氏一遺民耳。及皇師下浙西。搜羅人才。先生堅臥不出。亦豈無所見耶。旣而吳漢角立。東南中原割據。如蜂蟻然。天下非元有矣。先生之心。誠不忍天下之棼棼也。矧高皇帝握眞符而定金陵。先生固預占於十年之前。於是慨然以天下爲己任。束帛朝臨而夕起。一見之頃。首陳天命有在。高皇帝敬而信之。自謂吾之子房。謀無不用。用無不效。卒成天下大業。厥功偉哉。夫元運去矣。爲元氏遺民。猶遲遲不肯輕於他就。及不得已。必擇眞主自輔。運籌決策。取天下於羣雄之手。非取元氏也。先生於此。蓋亦審之熟矣。昔伊尹五就桀不用。退而耕於有莘之野。及遇成湯。翻然起而成佐商之功。聖賢所以汲汲於斯世者。豈有他哉。誠以畏天命。悲人窮。不得已而然也。先生之心。其卽伊尹之心歟。伊尹無愧於桀。先生無愧於元氏。則無愧於出處之節。夫何疑哉。嗟夫。自元氏主諸夏九十三年。華風淪於腥羶。我高皇帝一旦出而掃盡無遺。以雪神人之憤。使天下復見二帝三王之治。眞有功於天地萬世者也。

抑先生之心。殆有見於是哉。由是言之。比之伊尹。功無愧矣。於乎。如先生者。雖百世祀可也。況祠堂乎。是宜我皇上特垂意於斯。豈惟昭崇德報功之禮。又將興起其子孫。俾得以賢其賢而親其親。可謂仁之至。義之盡也歟。夔生也晚。忝與先生同浙水。而高山仰止之心。爲日久矣。敢書此於麗牲之石。以白先生之心。後知先生者。尙考於斯。

山水圖記

予友吉水令建德陳公懋過予曰。吾性愛山水。第奔走仕途。汨沒塵轍。不能一日遂其樂。間者命畫師繪圖。每遇暇時。輒一展玩。聊以適吾性耳。而好事者乃歌詩以詠之。然但能寫圖中之景。而未能得吾胸中之樂處也。子幸爲我發之。予閱之。歎曰。美哉圖乎。不滿咫尺。而風景萬狀。或隱或顯。詩固難盡其意也。觀夫層巒疊嶂。蜿蜒如蛟龍。蹲踞如虎豹者。山也。回溪曲港。迤邐如鋪練。澄深如凝碧者。水也。龍龍蔥蔥。翠黛昏蒙。此則山崖溪壑之樹木也。悠悠揚揚。變態無常。此則石根林杪之雲霧也。或臨渠架閣。俯瞰清泠。其二人如司馬德操過龐德公之共談也。或倚崖結廬。遐矚玄景。其一人如陶元亮之坐北窗而對南山也。乃若日出而西崖紅。月出而東林白。此又山間之朝暮也。倉庚鳴而東作。玄鳥歸而西成。此又山間之春秋也。圖中風景。獨公懋有得於斯。其樂蓋寓夫圖之外乎。抑予聞昔歐陽文忠公守滁州。民醇政簡。而化易行。嘗遊滁山。作醉翁亭。而自記其樂。蓋真得乎山川民物之情景者歟。今公懋三爲令。自萬安移南豐。皆劇邑。卓有異政。旣去民思。茲復往吉水。比二邑劇甚。治之當戴星出入以事乎民之樂。宜未暇及乎。

此也。其爲圖也有以哉。雖然。樂民之樂。而後樂山川之樂。矧吉之山川。不減乎滁。公懋之志。有契乎歐。他日政通人和之後。必將有以尋歐公之樂而樂之矣。圖云乎哉。書以期之。

洛陽思親亭記

歲己巳。予弟龍。自刑部員外郎出參河南布政司。議明年巡行部郡。遙望洛陽山川。慨然歎曰。昔我先君嘗令是邑。迄今四十餘年矣。今城廓如舊。廬井不易。民之繁庶。如先君之日乎。煙火連落。桑禾接畛。民之生養。如先君之日乎。衣冠載途。弦誦滿邑。禮教其如昔乎。男耕女織。老安少懷。風俗其如昔乎。邑猶故也。先君安在乎。顧瞻徘徊。泫然泣下。邑父老迎謁道傍。聞而前曰。我公其有子耶。公仁人也。曩在治時。獄訟平。賦役均。強者安。弱者遂。政修務舉。民熙熙樂於無事。今公不可作矣。吾民之老者死。壯者老。少者復壯。遞相傳頌。感公德未嘗一日忘。今幸見我公之子如見公也。亦爲之泣。參議徐諭之曰。先君已矣。予不肖孤。復奉天子命。承乏藩佐。撫綏爾民。爾民果不忘先君。尙各訓爾子孫。敦爾孝弟。力農務本。供乃職役。毋惰以廢業。毋頑以傷化。毋狡以訐俗。共樂聖朝太平之治。庶不負先君遺澤。而予繼序亦有賴焉。衆拜曰。諾。敢不唯命。於是歌舞欣欣而去。參議益自思。感聲嗟不足而詠歌之。遂成思親詩一章。諸縉紳文學咸羨賡其什。且相與謀曰。公之德洽於民心久矣。民感公德而死者。義也。參議感親寓而思者。孝也。民之思非與乎參議。因參議而思公之德益深。參議之思非與乎民。因民而思親之心益切。是豈偶然之故哉。殆夫欲慕公之德而假參議來耶。抑參議孝思所感。式孚民望耶。父子一氣。天人一理。誠未易言也。可無志